

Date : 6 Februari 2016
Title : Uniten memperkasa graduan bidang IT
Publication : Utusan Malaysia
Page : 1 & 4





SEBAHAGIAN pelajar menghadiri kuliah di Dewan Kuliah Kolej Teknologi Maklumat.



AZIZAH SULIMAN (tengah) memberi penerangan kepada pelajar.

Uniten tawar dua kursus baharu

Oleh: SITI AISHAH YUSOFF

JENAYAH siber adalah antara penyumbang tertinggi dalam kes-kes jenayah di negara-negara yang maju seperti Amerika Syarikat, China, Jepun dan Korea.

Tidak terkecuali, Malaysia turut menghadapi ancaman jenayah siber yang melibatkan pencerobohan data dan maklumat peribadi individu atau organisasi.

Justeru, menyedari situasi tersebut akan memberi kesan kepada pentadbiran dan keselamatan negara, Universiti Tenaga Nasional (Uniten) di bawah Kolej Teknologi Maklumat bakal menawarkan kursus baharu iaitu Ijazah Sarjana Muda Sains Komputer (Keselamatan Siber) dengan Kepujian melalui kemasukan pada bulan Mei ini.

Disamping itu pihak Uniten juga akan menawarkan satu lagi kursus Ijazah Sarjana Muda Teknologi Informasi (Media Visual) dengan Kepujian bagi memenuhi keperluan industri masa kini.

Penambahan dua kursus baharu itu telah menjadikan jumlah keseluruhan kursus yang ditawarkan di Kolej Teknologi Maklumat, Uniten sebanyak enam iaitu Ijazah Sarjana Muda Sains Komputer (Kejuruteraan Perisian) dengan Kepujian, Ijazah Sarjana Muda Sains Komputer (Sistem dan Rangkaian) dengan Kepujian, Ijazah Sarjana Muda Teknologi Informasi (Grafik dan Multimedia) dengan Kepujian dan Ijazah Sarjana Muda Teknologi Informasi (Sistem Informasi) dengan Kepujian.

Timbalan Dekan, Akademik dan Jaminan Kualiti, Uniten, Prof. Madya Dr. Azizah Suliman berkata, kursus Ijazah Sarjana Muda Sains Komputer (Keselamatan Siber) tersebut ditawarkan berdasarkan kepada

permintaan dan situasi semasa yang berlaku dalam negara melibatkan keselamatan siber. Kursus ini telah mendapat kelulusan daripada Kementerian Pendidikan Tinggi pada tahun lepas.

"Kajian yang dilakukan oleh Pasukan Respons Kecemasan Komputer Malaysia (MyCERT) iaitu sebuah agensi di bawah Kementerian Sains, Teknologi dan Inovasi (MOSTI) jelas menunjukkan ancaman terhadap keselamatan siber dalam negara semakin meningkat saban tahun.

"Dalam pada itu kajian dari Perbadanan Pembangunan Multimedia (Mdec) juga menunjukkan kepentingan graduan memiliki kemahiran berhubung keselamatan siber pada masa depan," katanya.

"Kursus ini akan memberi pendedahan kepada pelajar untuk mengenal pasti kelemahan sistem komputer, menganalisa ancaman yang boleh berlaku kepada sistem komputer dan mempertahankan sistem komputer daripada serangan siber.

"Graduan bersedia untuk mengelakkan serangan siber dan melaksanakan langkah-langkah keselamatan dalam pelbagai tetapan yang melibatkan sistem dan rangkaian komputer," katanya.

Tambah Azizah, program Visual Media pula ditubuhkan bagi menghasilkan graduan yang berkebolehan dalam membina kandungan media yang berbentuk kreatif dan tidak hanya tertumpu kepada satu aspek kandungan sahaja.

"Sekarang banyak kursus berkaitan multi-

media ditawarkan kepada graduan, bagaimanapun, kita masih ada kekurangan dalam aspek pembangunan kandungan.

"Kita perlu mempunyai disiplin untuk utamakan bidang kreatif media bagi menghasilkan individu yang pandai menggunakan animasi dalam masa yang sama mereka mampu menghasilkan sendiri kandungan yang lebih kreatif. Ini kerana ketika ini kebanyakan kandungan dan visual media dihasilkan daripada individu yang berbeza," katanya.

Azizah berkata, permohonan bagi dua program terbaharu itu mula dibuka kepada pelajar bermula 2 Mac ini. Sementara bagi permohonan pelajar luar negara pula dibuka dari 4 Januari hingga 24 Mac ini.

Sebarang maklumat lanjut berkenaan permohonan program boleh layari laman web Uniten, www.uniten.edu.my. Orang ramai juga dijemput menghadiri Hari Terbuka Uniten yang akan diadakan pada 5 Mac ini di Kampus Putrajaya untuk mendapatkan maklumat terkini berkenaan semua program tawaran Uniten.



info

Jumlah pelajar Fakulti Teknologi Maklumat adalah sebanyak 1,400

- Ijazah Sarjana Muda Sains Komputer (Kejuruteraan Perisian) dengan Kepujian.
- Ijazah Sarjana Muda Sains Komputer (Sistem dan Rangkaian) dengan Kepujian.
- Ijazah Sarjana Muda Teknologi Informasi (Grafik dan Multimedia) dengan Kepujian.
- Ijazah Sarjana Muda Teknologi Informasi (Sistem Informasi) dengan Kepujian.
- Ijazah Sarjana Muda Sains Komputer (Keselamatan Siber) dengan Kepujian.
- Ijazah Sarjana Muda Teknologi Informasi (Media Visual).
- Permohonan program terbaharu itu mula dibuka kepada pelajar bermula 2 Mac ini. Sementara bagi permohonan pelajar luar negara pula dibuka dari 4 Januari hingga 24 Mac ini.
- Sebarang maklumat lanjut berkenaan permohonan program boleh layari laman web Uniten, www.uniten.edu.my.